

Na osnovu člana 17. stav 2. i člana 72. Zakona o hrani („Službeni glasnik BiH“, broj 50/04) i člana 17. Zakona o Vijeću ministara Bosne i Hercegovine („Službeni glasnik BiH“, br. 30/03, 42/03, 81/06, 76/07, 81/07, 94/07 i 24/08), Vijeće ministara Bosne i Hercegovine, na prijedlog Agencije za sigurnost hrane Bosne i Hercegovine u saradnji s nadležnim organima entiteta i Brčko Distrikta Bosne i Hercegovine, na sjednici _____, održanoj _____ godine, donijelo je

PRAVILNIK
O SISTEMIMA KVALITETE ZA POLJOPRIVREDNE I PREHRAMBENE
PROIZVODE * ¹

DIO PRVI - OPĆE ODREDBE

Član 1.
(Predmet)

(1) Pravilnik o sistemima kvalitete za poljoprivredne i prehrambene proizvode (u daljnjem tekstu: Pravilnik) utvrđuje sisteme kvalitete za poljoprivredne i prehrambene proizvode, koji služe kao osnova za označavanje, te prema potrebi, zaštitu naziva i izraza, koji se posebno navode ili opisuju poljoprivredni i prehrambeni proizvod s karakteristikama proizvoda s dodanom vrijednosti i/ili svojstvima s dodanom vrijednosti koje su posljedica poljoprivrednih metoda ili metoda prerade koje se koriste prilikom njihove proizvodnje, ili mjesta njihove proizvodnje ili promidžbe.

(2) Ovim Pravilnikom propisuje se postupak zaštite oznaka originalnosti i zaštite oznake geografskog porijekla i postupak zaštite oznaka garantovano tradicionalni specijalitet poljoprivrednih i prehrambenih proizvoda i neobavezne oznake kvaliteta na području Bosne i Hercegovine, kao i postupak za podnošenje zahtjeva za registraciju i podnošenje prigovora za oznake originalnosti, oznake geografskog porijekla i oznake garantovano tradicionalni specijalitet poljoprivrednih i prehrambenih proizvoda na nivou Evropske unije.

(3) Pravilnik utvrđuje mjere namijenjene pružanju podrške poljoprivrednim i proizvodnim djelatnostima i poljoprivrednim sistemima koji se povezuju s visoko kvalitetnim proizvodima, čime doprinose ostvarivanju ciljeva politike ruralnog razvoja.

* ¹ Uredba Komisije (EU) broj 1151/2012 od 21. novembra 2012. o sistemima kvalitete za poljoprivredne i prehrambene proizvode i o stavljanju izvan snage Uredbe (EU) broj 509/2006 i Uredbe (EU) broj 510/2006.; Provedbena uredba Komisije (EU) br. 668/2014 od 13. jula 2014. o utvrđivanju pravila za primjenu Uredbe (EU) br. 1151/2012 Evropskog parlamenta i Vijeća o sistemima kvalitete za poljoprivredne i prehrambene proizvode; Delegirana uredba Komisije (EU) br. 665/2014 od 11. marta 2014. o dopuni Uredbe (EU) br. 1151/2012 Evropskog parlamenta i Vijeća u pogledu uslova upotrebe neobavezne oznake kvalitete „planinski proizvod”; Delegirana Uredba Komisije (EU) br. 664/2014 od 18. decembra 2013. o dopuni Uredbe (EU) br. 1151/2012 Evropskog parlamenta i Vijeća s obzirom na utvrđivanje simbola Unije za zaštićene oznake originalnosti, zaštićene oznake geografskog porijekla i garantovano tradicionalne specijalitete i s obzirom na određena pravila o porijeklu, određena pravila postupka i određena dodatna prelazna pravila.

Član 2. (Cilj)

Cilj ovog Pravilnika je osiguranje poštenog tržišnog natjecanja za poljoprivrednike i proizvođače poljoprivrednih i prehrambenih proizvoda sa karakteristikama i obilježjima proizvoda s dodanom vrijednosti, omogućavanje dostupnosti pouzdanih informacija potrošačima vezanih za takve proizvode, poštivanje prava intelektualnog vlasništva, cjelovitost unutrašnjeg tržišta u smislu obavještavanja kupaca i potrošača o obilježjima i svojstvima proizvodnje i tih proizvoda od strane proizvođača poljoprivrednih i prehrambenih proizvoda.

Član 3. (Područje primjene)

(1) Ovaj Pravilnik odnosi se na poljoprivredne i prehrambene proizvode koji su namijenjeni prehrani ljudi i druge proizvode navedene u Aneksu I ovog Pravilnika.

(2) Ovaj Pravilnik se ne primjenjuje na jaka alkoholna pića, aromatizirana vina i kategorije proizvoda od vinove loze, s izuzetkom vinskog octa, koji su uređeni posebnim propisima.

Član 4. (Definicije)

(1) U svrhu ovog Pravilnika primjenjuju se sljedeće definicije:

- a) „**sistemi kvalitete**” znače sisteme definirane kao u Dijelu drugom poglavljima I, II i III ovog Pravilnika;
- b) „**grupa**” znači bilo koje udruživanje proizvođača ili prerađivača istog poljoprivrednog ili prehrambenog proizvoda, bez obzira na njihov pravni oblik ili sastav.
- c) „**tradicionalan**” znači dokazana upotreba na domaćem tržištu kroz vremenski period koji omogućava prenos s generacije na generaciju i taj period mora trajati najmanje 30 godina;
- d) „**označavanje**” znači svaka riječ, pojedinost, žig, robna marka, slikovni prikaz ili znak koji se odnosi na prehrambeni proizvod i koji se nalazi na bilo kojem pakiranju, dokumentaciji, obavijesti, etiketi, obruču ili privjesnici, koji prate ili se odnose na takav prehrambeni proizvod;
- e) „**posebna karakteristika**” u vezi s proizvodom znači posebna svojstva proizvodnje po kojima se proizvod jasno razlikuje od ostalih sličnih proizvoda iste kategorije;
- f) „**generički nazivi**” znači nazive proizvoda koji su, iako se odnose na mjesto, regiju ili državu u kojoj je proizvod prvobitno proizveden ili stavljen na tržište, postali uobičajenim nazivom nekog proizvoda u Bosni i Hercegovini;

- g) „**faza proizvodnje**” znači proizvodnja, prerada ili izrada;
- h) „**prerađeni proizvodi**” znači prehrambeni proizvodi koji nastaju preradom neprerađenih proizvoda. Prerađeni proizvodi mogu sadržavati sastojke koji su potrebni za njihovu proizvodnju ili da bi im dali posebne karakteristike;
- i) „**homonimi**” podrazumijevaju naziv dvije ili više regija ili mjesta porijekla prehrambenog proizvoda koji su jednaki ili gotovo jednaki u pisanom ili govornom obliku;
- j) „**registracija**” je zaštita oznake originalnosti ili oznake geografskog porijekla;
- k) „**oznaka originalnosti**” znači naziv kojim se označava proizvod:

- 1) koji potiče iz određenog mjesta ili regije;
- 2) čiji kvalitet ili karakteristike u bitnom ili isključivo, nastaju pod uticajem posebnih prirodnih i ljudskih faktora određene geografske sredine; i
- 3) čije se sve faze proizvodnje odvijaju u određenom geografskom području.

l) „**oznaka geografskog porijekla**” znači naziv kojim se označava proizvod:

- 1) koji potiče iz određenog mjesta ili regije;
- 2) čiji se kvalitet, ugled ili ostale karakteristike pripisuju njegovom geografskom porijeklu; i
- 3) čija se najmanje jedna faza proizvodnje odvija u određenom geografskom području.

(2) Neovisno od tačke k) i l) iz stava (1) određeni nazivi smatraju se oznakama originalnosti iako sirovine za dotične proizvode dolaze iz geografskog područja koje je veće ili različito od definisanog geografskog područja pod uslovom:

- a) da je područje proizvodnje definisano;
- b) da postoje posebni uslovi za proizvodnju sirovina;
- c) da postoje sistemi kontrole koji osiguravaju ispunjavanje uslova iz tačke b).

(3) Samo žive životinje, meso i mlijeko mogu se smatrati sirovinama iz stava (2) ovog člana.

DIO DRUGI – ZAŠTITA OZNAKA

Poglavlje I

ZAŠTIĆENA OZNAKA ORIGINALNOSTI I ZAŠTIĆENA OZNAKA GEOGRAFSKOG PORIJEKLA POLJOPRIVREDNIH I PREHRAMBENIH PROIZVODA

Član 5.

(Sistem zaštićenih oznaka originalnosti i oznaka geografskog porijekla)

Sistem zaštićenih oznaka originalnosti i zaštićenih oznaka geografskog porijekla uspostavlja se za pružanje pomoći proizvođačima proizvoda vezanih uz geografska područja sa ciljem osiguranja:

- a) pravednog povrata za kvalitetu njihovih proizvoda,
- b) ujednačene zaštite naziva kao prava intelektualnog vlasništva na području Bosne i Hercegovine,
- c) jasne informacije potrošačima o svojstvima proizvoda s dodanom vrijednosti.

Član 6.

(Kriteriji za registraciju)

- (1) Generički nazivi ne mogu se registrirati kao zaštićene oznake originalnosti ili zaštićene oznake geografskog porijekla.
- (2) Naziv se ne može registrirati kao oznaka originalnosti ili oznaka geografskog porijekla ako je u suprotnosti s nazivom biljne sorte ili životinjske pasmine, što bi potrošača moglo dovesti u zabludu o pravom porijeklu proizvoda.
- (3) Naziv čija se registracija predlaže koji je u potpunosti ili djelomično homonim s nazivom već upisanim u registar iz člana 21. ne može se registrirati, osim ako nema dovoljno razlike u praksi između uslova lokalne i tradicionalne upotrebe i prezentacije naknadno registriranog homonima i naziva već upisanog u registar, uvažavajući potrebu da se jednako postupi prema proizvođačima, te da se potrošači ne dovode u zabludu.
- (4) Naziv koji je homonim i koji pogrešno upućuje potrošača da proizvodi dolaze iz nekog drugog područja, čak iako je takav naziv tačan u odnosu na stvarno područje, regiju ili mjesto porijekla tih proizvoda se neće registrirati.
- (5) Naziv koji se predlaže za registraciju kao oznaka originalnosti ili oznaka geografskog porijekla ne treba registrirati ako takva registracija naziva predloženog kao oznaka originalnosti ili oznaka geografskog porijekla zbog ugleda, priznatosti i dužine upotrebe žiga, može dovesti potrošača u zabludu o pravom porijeklu proizvoda.

Član 7. **(Specifikacija proizvoda)**

Da bi mogao dobiti oznaku originalnosti ili oznaku geografskog porijekla poljoprivredni ili prehrambeni proizvod mora biti u skladu sa specifikacijom proizvoda (u daljem tekstu: specifikacija), koja uključuje:

- a) naziv koji se zaštićuje kao oznaka originalnosti ili oznaka geografskog porijekla, kako se koristi u trgovini ili svakodnevnom govoru, te samo na jezicima koji se koriste u Bosni i Hercegovini ili su se kroz povijest koristili za opis određenog proizvoda u određenom geografskom području;
- b) naziv se registrira na njegovom izvornom pismu, u slučaju kada izvorno pismo nije latinica, zajedno sa nazivom na izvornom pismu se registruje i njegov prijepis na latinici;
- c) opis poljoprivrednog ili prehrambenog proizvoda uključujući, ako je primjereno, sirovine te glavna fizikalna, hemijska, mikrobiološka i senzorska svojstva poljoprivrednog ili prehrambenog proizvoda;
- d) definiciju geografskog područja, ograničenog u pogledu veze iz tačke g) alineja 1) ili 2) ovog člana, te ako je prikladno detalje koji pokazuju usklađenost sa zahtjevima iz člana 4 st. (2) i (3);
- e) dokaz da proizvod potiče iz određenog geografskog područja iz člana 4. tačka k);
- f) opis metode dobivanja proizvoda i, ako je primjereno, autentične i nepromjenljive lokalne metode kao i podatke o pakiranju ako grupa koja podnosi zahtjev tako odluči i navede razloge zbog kojih se pakiranje mora obaviti na određenom geografskom području kako bi se sačuvao kvalitet ili osigurala originalnost ili kontrola;
- g) detalje koji uspostavljaju sljedeće:
 - 1) vezu između kvalitete ili značajki proizvoda i geografskog okruženja iz člana 4. tačka k); ili
 - 2) prema potrebi, vezu između specifične kvalitete, ugleda ili neke druge značajke poljoprivrednog ili prehrambenog proizvoda i geografskog porijekla iz člana 4. tačka l);
- h) naziv i adresu nadležnog organa ili, ako je dostupno, naziv i adresu organa koji provjeravaju usklađenost s odredbama specifikacije u skladu s članom 51. i njihove specifične zadaće;
- i) bilo koja od specifičnih pravila označavanja poljoprivrednog ili prehrambenog proizvoda.

Član 8.

(Postupak za registraciju oznake originalnosti i oznake geografskog porijekla)

- (1) Postupak za registraciju oznake originalnosti i oznake geografskog porijekla poljoprivrednog i prehrambenog proizvoda pokreće se zahtjevom koji se podnosi Agenciji za sigurnost hrane Bosne i Hercegovine (u daljem tekstu: Agencija).
- (2) Postupak iz stava (1) ovoga člana provodi Agencija uz pomoć Komisije za registraciju oznaka originalnosti i oznaka geografskog porijekla prehrambenih i poljoprivrednih proizvoda u Bosni i Hercegovini (u daljnjem tekstu: Komisija) koju imenuje Vijeće ministara Bosne i Hercegovine, na prijedlog Agencije.
- (3) Komisiju čine po jedan predstavnik Agencije, Instituta za intelektualno vlasništvo Bosne i Hercegovine, Vanjskotrgovinske komore Bosne i Hercegovine i dva predstavnika fakulteta prehrambene tehnologije i/ili veterinarske medicine.
- (4) Predsjednik Komisije iz stava (2) ovog člana je predstavnik Agencije.

Član 9.

(Poslovi Komisije)

Komisija iz člana 8. stav (2) ovog Pravilnika obavlja sljedeće poslove:

- a) vrši stručni pregled zahtjeva za registraciju oznake originalnosti, odnosno oznake geografskog porijekla prehrambenog i poljoprivrednog proizvoda i predlaže Agenciji donošenje rješenja o registraciji oznake;
- b) razmatra pristigle prigovore;
- c) predlaže dopunu zahtjeva za registraciju oznake originalnosti, odnosno oznake geografskog porijekla;
- d) razmatra zahtjeve za naknadnu izmjenu i dopunu specifikacije prehrambenog i poljoprivrednog proizvoda;
- e) razmatra zahtjeve za pravo upotrebe registrirane oznake originalnosti, odnosno, geografskog porijekla.

Član 10.

(Podnosilac zahtjeva za registraciju oznake originalnosti i oznake geografskog porijekla)

- (1) Zahtjev za registraciju oznake originalnosti ili oznake geografskog porijekla (u daljem tekstu: zahtjev za registraciju) za pojedini poljoprivredni ili prehrambeni proizvod se podnosi od strane zainteresovane grupe.
- (2) Izuzetno, pojedini proizvođač i/ili prerađivač, neovisno o tome je li fizička ili pravna osoba, može podnijeti zahtjev za registraciju iz stava (1) samo:

- a) ako je u vrijeme podnošenja toga zahtjeva jedini proizvođač, odnosno prerađivač prehrambenog ili poljoprivrednog proizvoda za koji je spreman podnijeti zahtjev za registraciju oznake originalnosti ili oznake geografskog porijekla u određenom geografskom području;
 - b) ako određeno geografsko područje ima karakteristike koje se znatno razlikuju od svojstava proizvoda proizvedenih u susjednim područjima.
- (3) U slučaju iz stava (2) ovog člana pojedina fizička ili pravna osoba koja je podnijela zahtjev za registraciju oznake predstavlja grupu u smislu člana 4. stava (1) tačka b) ovog Pravilnika.
- (4) Podnositelj zahtjeva iz st. (1) i (2) ovog člana može podnijeti zahtjev za registraciju samo za poljoprivredne ili prehrambene proizvode koje proizvodi ili prerađuje.
- (5) Podnositelj zahtjeva iz st. (1) i (2) ovoga člana, nakon što registrira određeni poljoprivredni ili prehrambeni proizvod u Bosni i Hercegovini, u skladu s ovim Pravilnikom, može podnijeti zahtjev za registraciju oznake originalnosti i oznake geografskog porijekla na nivou Evropske unije.
- (6) Zahtjev iz stava (5) ovog člana šalje se Evropskoj komisiji putem Agencije.

Član 11.
(Zahtjev za registraciju)

- (1) Podnosilac zahtjeva za registraciju oznake originalnosti i oznake geografskog porijekla, poljoprivrednih i prehrambenih proizvoda potrebno je da Agenciji dostavi:
- a) popunjen obrazac zahtjeva za registraciju iz Aneksa II ovog Pravilnika;
 - b) kopiju dokaza za registraciju grupe,
 - c) izjavu nadležnog organa grupe o usvojenoj odluci o zaštiti oznake originalnosti i oznake geografskog porijekla poljoprivrednog ili prehrambenog proizvoda
 - d) punomoć (ukoliko grupu zastupa ovlašteni zastupnik ili punomoćnik, ovjerenu od strane javnog bilježnika),
 - e) specifikaciju proizvoda u skladu sa članom 7. ovog Pravilnika,
 - f) popunjen obrazac jedinstvenog dokumenta iz Aneksa III ovog Pravilnika,
 - g) potvrdu certifikacijskog tijela da se može vršiti certifikacija.
- (2) Zahtjev za registraciju sa dokumentacijom iz stava (1) ovog člana dostavlja se Agenciji putem pošte i elektronskim putem.

Član 12.
(Postupak po prijemu zahtjeva za registraciju)

- (1) Agencija po prijemu zahtjeva iz člana 11. ovog Pravilnika formalno-pravno vrši pregled zahtjeva.
- (2) Ako je zahtjev formalno nepotpun Agencija traži otklanjanje nedostataka i dopunu zahtjeva od podnosioca zahtjeva u roku od 30 dana.
- (3) Agencija po prijemu potpunog zahtjeva iz člana 11. ovog Pravilnika zahtjev upućuje Komisiji koja vrši njegovu stručnu provjeru.
- (4) Rok za provjeru zahtjeva iz stava (3) ovog člana je 6 mjeseci od datuma podnošenja zahtjeva prema Agenciji.
- (5) Ukoliko je potrebno Agencija od podnosioca zahtjeva može tražiti pojašnjenje elemenata iz specifikacije kao i naložiti dopunu specifikacije od podnosioca zahtjeva u roku od 30 dana.
- (6) Izuzetno od st. (2) i (5) ovog člana rok se produžava na zahtjev podnosioca zahtjeva za najviše dva mjeseca.
- (7) Ako podnositelj zahtjeva ne dopuni zahtjev u propisanom roku, Agencija će rješenjem zahtjev odbaciti.
- (8) Ako su ispunjeni svi uslovi propisani ovim Pravilnikom na prijedlog Komisije Agencija prihvata zahtjev za registraciju.
- (9) Obavijest o zahtjevu se objavljuje u Službenom glasniku BiH, a specifikacija na web stranici Agencije.

Član 13.
(Podnošenje prigovora)

- (1) Obrazloženi prigovor na objavljeni zahtjev za registraciju oznake originalnosti originalnosti, odnosno oznake geografskog porijekla prehrambenog ili poljoprivrednog proizvoda može se podnijeti u roku od tri mjeseci računajući od dana objavljivanja sadržaja zahtjeva u „Službenom glasniku BiH“.
- (2) Prigovor, u roku iz stava (1) ovog člana, može se podnijeti ako:
 - a) zahtjev za registraciju nije u skladu s odredbama člana 4. tač. k) i l) i člana 6. ovog Pravilnika, ili
 - b) bi predložena registracija oznake ugrozila postojanje potpuno ili djelomično istovjetne oznake ili žiga ili postojanje proizvoda koji se nalaze na tržištu

najmanje pet godina prije dana objavljivanja zahtjeva u „Službenom glasniku BiH“ u skladu s članom 12. stav (9) ovog Pravilnika, ili
c) je oznaka, za čiju je registraciju podnesen zahtjev, po svojoj prirodi generička, o čemu podnosilac mora dostaviti potrebne dokaze.

(3) Prigovor iz stava (1) ovog člana podnosi se na obrascu Izjave o prigovora iz Aneksa IV ovog Pravilnika.

(4) Rok za podnošenje prigovora iz stava (1) ovog člana ne može se produžavati.

Član 14. **(Postupak povodom prigovora)**

(1) Komisija iz člana 8. stav (2) ovog Pravilnika rješava o prigovoru.

(2) Ako Komisija utvrdi da prigovor ne ispunjava formalne uslove propisane članom 13. ovog Pravilnika, prigovor se zaključkom odbacuje o čemu se obavještava podnosilac zahtjeva i podnosilac prigovora, te se postupak za registraciju nastavlja.

(3) Ako prigovor ispunjava formalne uslove iz člana 13. ovog Pravilnika, Komisija dostavlja prigovor s priloženim dokazima podnosiocu zahtjeva za registraciju i poziva ga da u roku od 30 dana dostavi pisano izjašnjenje o prigovoru.

(4) Rok za izjašnjavanje na prigovor može se, na zahtjev podnosioca zahtjeva za registraciju, iz opravdanih razloga produžiti za još najviše 30 dana.

(5) Ako podnosilac zahtjeva za registraciju u propisanom roku ne dostavi izjašnjavanje na prigovor, donosi se rješenje o odbijanju zahtjeva.

Član 15. **(Ispitivanje osnovanosti prigovora)**

(1) Ako se podnosilac zahtjeva za registraciju izjasni na podneseni prigovor, Komisija ispituje osnovanost prigovora u okviru razloga zbog kojih je podnesen.

(2) Agencija rješenjem odbija zahtjev za registraciju oznake, ako utvrdi da je prigovor osnovan i o tome obavještava podnosioca zahtjeva za registraciju i podnosioca prigovora.

(3) Agencija rješenjem odbija prigovor ako utvrdi da je prigovor neosnovan i o tome obavještava podnosioca zahtjeva za registraciju i podnosioca prigovora.

(4) U svrhu razmatranja prigovora, Komisija može zatražiti konstultacije s podnosiocem zahtjeva i podnosiocem prigovora (u daljnjem tekstu: zainteresirane strane) radi postizanja sporazuma.

(5) Ako zainteresirane strane postignu sporazum u roku od tri mjeseca od dana pozivanja na konsultacije, dostavljaju Komisiji Obavijest o završetku savjetovanja nakon postupka prigovora iz Aneksa V ovog Pravilnika o svim faktorima koji su omogućili da sporazum bude postignut uključujući i njihova mišljenja.

(6) Ako postignuti sporazum zainteresiranih strana iz stava (5) ovog člana ne mijenja ili nebitno mijenja sadržaj obavještenja o zaprimljenom zahtjevu iz člana 12. Pravilnika, Komisija nastavlja postupak registracije.

Član 16.

(Okončanje postupka i upis u registar)

(1) Na osnovu provedenog postupka za registraciju i prijedloga Komisije, Agencija donosi rješenje o registraciji oznake originalnosti, odnosno oznake geografskog porijekla prehrambenog ili poljoprivrednog proizvoda (u daljnjem tekstu: rješenje o registraciji).

(2) Danom pravosnažnosti rješenja o registraciji, oznaka se upisuje u odgovarajući registar, a svaki pojedini član udruženja koji je proizvođač, odnosno prerađivač prehrambenog ili poljoprivrednog proizvoda s registriranom oznakom upisuje se u odgovarajući registar.

(3) Registrirana oznaka originalnosti, odnosno oznaka geografskog porijekla objavljuje se u „Službenom glasniku BiH“ i na web-stranici Agencije.

Član 17.

(Nazivi, znakovi i oznake)

(1) Zaštićene oznake originalnosti i zaštićene oznake geografskog porijekla može koristiti svaki privredni subjekat koji stavlja na tržište proizvod proizveden u skladu s odgovarajućom specifikacijom.

(2) Pravilnikom o izgledu i načinu korištenja znaka oznake originalnosti, oznake geografskog porijekla i oznake tradicionalnog ugleda hrane (“Službeni glasnik BiH”, broj 81/12) propisuje se izgled i način korištenja znaka oznake originalnosti, oznake geografskog porijekla i oznake tradicionalnog ugleda prehrambenog proizvoda, te način izdavanja znaka.

Član 18.
(Izmjene specifikacije)

- (1) Zahtjev za odobrenje izmjene specifikacije može podnijeti grupa sa legitimnim interesom.
- (2) Zahtjevi za odobrenje veće izmjene specifikacije proizvoda za zaštićene oznake originalnosti i zaštićene oznake geografskog porijekla sastavljaju se u skladu s obrascem iz Aneksa VI u skladu sa zahtjevima iz člana 11. ovog Pravilnika.
- (3) Izmijenjeni jedinstveni dokument sastavlja se u skladu s obrascem iz Aneksa III ovog Pravilnika.
- (4) Ako predložene veće izmjene specifikacije uključuju jednu ili više izmjena provodi se postupak utvrđen čl. 10., 11., 12., 13., 14. i 15. ovog Pravilnika.
- (5) Zahtjev za odobrenje manje izmjene sastavlja se u skladu s obrascem iz Aneksa VII ovog Pravilnika.
- (6) Da bi se izmjena smatrala manjom u slučaju sistema kvalitete zaštite oznaka originalnosti i zaštite oznake geografskog porijekla treba da:
 - a) se ne odnosi na ključna obilježja proizvoda;
 - b) ne mijenja poveznicu iz tačke g) alineja 1) ili 2) člana 7. ovog Pravilnika;
 - c) ne uključuje promjenu naziva ili bilo kojeg dijela naziva proizvoda;
 - d) ne utiče na određeno geografsko područje;
 - e) ne predstavlja povećanje ograničenja u trgovanju proizvodom ili njegovim sirovinama.
- (7) Ako su predložene izmjene manje Komisija odobrava ili odbija zahtjev, bez provođenja postupka iz stava (4) ovog člana.
- (8) Zahtjevima za odobrenje manje izmjene koja se odnosi na zaštićenu oznaku originalnosti ili zaštićenu oznaku geografskog porijekla prilaže se ažurirani jedinstveni dokument, ako je izmijenjen, koji se sastavlja u skladu s obrascem iz Aneksa VII.
- (9) Upućivanje na objavu specifikacije proizvoda koje se navodi u izmijenjenom jedinstvenom dokumentu vodi na ažuriranu verziju predložene specifikacije proizvoda.
- (10) Izmjena specifikacije objavljuje se u „Službenom glasniku BiH“ i na web stranici Agencije.

Član 19.
(Zaštita oznake)

- (1) Registrirana oznaka originalnosti i oznaka geografskog porijekla štiti se od:
- a) bilo kakve direktne ili indirektne komercijalne upotrebe registrirane oznake za proizvode koji nisu obuhvaćeni registracijom, kao i onih proizvoda sličnih s proizvodima registriranim pod tom oznakom ili u onoj mjeri u kojoj korištenje oznake iskorištava ugled zaštićene oznake, uključujući kada se ti proizvodi koriste kao sastojak;
 - b) bilo koje zloupotrebe, imitacije ili pozivanja, čak i ako je naznačeno istinito geografsko porijeklo proizvoda ili usluga, ili ako je naziv proizvoda preveden, ili ako se zaštićenoj oznaci dodaju riječi „stil“, „tip“, „način“, „po postupku“, „metoda“, „kao što se proizvodi u“, „imitacija“ ili slično, uključujući slučajeve kada se ti proizvodi koriste kao sastojak;
 - c) bilo koje lažne informacije koje mogu dovesti u zabludu potrošača u odnosu na pravo porijeklo, prirodu ili suštinski kvalitet prehrambenog proizvoda, istaknute na unutrašnjoj ili vanjskoj ambalaži, materijalu ili dokumentu koji se odnosi na proizvod i pakovanje proizvoda u kontejner, koji bi stvorio pogrešan utisak o porijeklu proizvoda;
 - d) bilo kojeg drugog postupka koji može dovesti u zabludu potrošača u odnosu na pravo porijeklo prehrambenog proizvoda.
- (2) Kada zaštićena oznaka originalnosti ili zaštićena oznaka geografskog porijekla sadrži u sebi naziv proizvoda koji se smatra generičkim, korištenje toga generičkog naziva ne smatra se suprotnim tč. a) ili b) stava (1) ovog člana.
- (3) Zaštićene oznake originalnosti i zaštićene oznake geografskog porijekla ne mogu postati generičke.
- (4) Zabranjuje se upotreba naziva uporedivih prehrambenih proizvoda koji su zaštićeni oznakama originalnosti i oznakama geografskog porijekla hrane u zemljama Evropske unije i drugim zemljama a nisu u skladu s proizvođačkom specifikacijom tih proizvoda.
- (5) Odbit će se zahtjev za registraciju oznake originalnosti i oznake geografskog porijekla prehrambenih proizvoda čija upotreba odgovara situacijama navedenim u stavu (4) ovog člana.

Član 20.

(Odnos između žigova, oznaka originalnosti i oznaka geografskog porijekla)

- (1) Kada se oznaka originalnosti ili oznaka geografskog porijekla registrira u skladu s ovim Pravilnikom, registracija žiga čija bi upotreba bila u suprotnosti s članom 19. stav (1) ovog Pravilnika i koji se odnosi na isti tip proizvoda odbija se ako je zahtjev za registraciju

žiga podnesen nakon datuma podnošenja Agenciji zahtjeva za registraciju u vezi s oznakom originalnosti ili oznakom geografskog porijekla.

(2) Žigovi koji su registrirani u suprotnosti sa stavom (1) ovog člana proglašavaju se nevažećim.

(3) Odredbe st. (1) i (2) ovog člana primjenjuju se neovisno o odredbama Zakona o žigu („Službeni glasnik BiH“, br. 53/10).

Član 21. **(Sadržaj Registra oznaka)**

(1) U Registar se upisuju sljedeći podaci:

- a) registarski broj oznake originalnosti, odnosno oznake geografskog porijekla prehrambenog ili poljoprivrednog proizvoda;
- b) naziv prehrambenog ili poljoprivrednog proizvoda koji se štiti oznakom originalnosti, odnosno geografskog porijekla;
- c) kategorija prehrambenog ili poljoprivrednog proizvoda utvrđena Aneksom I. ovog Pravilnika, te potkategorija prehrambenog ili poljoprivrednog proizvoda koji se štiti oznakom originalnosti, odnosno oznakom geografskog porijekla;
- d) podatke o podnosiocu zahtjeva, odnosno udruženju (naziv udruženja, adresa i zemlja);
- e) izgled (oblik) oznake originalnosti, odnosno oznake geografskog porijekla, ako je podnosilac zahtjeva ima;
- f) datum podnošenja zahtjeva;
- g) datum objavljivanja zahtjeva u „Službenom glasniku BiH“;
- h) prigovor, ako je podnesen (broj, datum, podaci o podnosiocu);
- i) datum donošenja rješenja o registraciji oznake i upisa u Registar te broj rješenja;
- j) datum objavljivanja registrirane oznake u „Službenom glasniku BiH“;
- k) naziv i adresa certifikacijskog tijela koje obavlja kontrolu.

(2) Registar je javan.

(3) Zainteresirano lice može od Agencije zatražiti izvod iz Registara.

Član 22. **(Pravo upotrebe registriranih oznaka)**

Pravo upotrebe registriranih oznaka originalnosti ili oznaka geografskog porijekla pripada svim proizvođačima i/ili prerađivačima prehrambenog ili poljoprivrednog proizvoda, dok zadovoljavaju uslove određene ovim Pravilnikom.

Član 23.
(Postupak upisa korisnika registriranih oznaka)

(1) Postupak za upis novih korisnika registrirane oznake originalnosti ili oznake geografskog porijekla pokreće se podnošenjem zahtjeva Agenciji za pravo upotrebe registrirane oznake originalnosti, odnosno oznake geografskog porijekla.

(2) Zahtjev za pravo upotrebe sadrži:

- a) registarski broj oznake originalnosti, odnosno geografskog porijekla prehrambenog ili poljoprivrednog proizvoda;
- b) naziv oznake originalnosti ili oznake geografskog porijekla;
- c) podatke o podnosiocu zahtjeva (ime i prezime, odnosno naziv pravnog ili fizičkog lica, punu adresu, odnosno sjedište te njihov matični broj, a u slučaju udruženja, također pravni status udruženja);
- d) naziv certifikacijskog tijela iz člana 51. ovog Pravilnika kojeg je podnosilac zahtjeva izabrao za utvrđivanje usklađenosti i kontrolu, te pisanu saglasnost tog tijela o njegovom prihvatanju;
- e) potvrdu o usklađenosti;
- f) specifikaciju prehrambenog ili poljoprivrednog proizvoda u skladu s članom 7. ovog Pravilnika;
- g) punomoć, ako podnosioca zastupa ovlašteni zastupnik ili opunomoćenik;
- h) potpis podnosioca zahtjeva, zastupnika odnosno opunomoćenika.

(3) Na osnovu pozitivnog mišljenja Komisije, Agencija donosi rješenje o pravu upotrebe registrirane oznake originalnosti, odnosno registrirane oznake geografskog porijekla.

(4) Danom pravosnažnosti rješenja o pravu upotrebe registrirane oznake originalnosti, odnosno registrirane oznake geografskog porijekla prehrambenog ili poljoprivrednog proizvoda, novi korisnik upisuje se u odgovarajući registar.

Poglavlje II

GARANTOVANO TRADICIONALNI SPECIJALITETI

Član 24.

(Sistem za garantovano tradicionalne specijalitete)

Sistem za garantovano tradicionalne specijalitete uspostavlja se kako bi sačuvao tradicionalne metode proizvodnje i recepte pružajući pomoć proizvođačima tradicionalnog proizvoda prilikom stavljanja na tržište i obavještanja potrošača o svojstvima koja dodaju vrijednost njihovim tradicionalnim receptima i proizvodima.

Član 25.

(Kriteriji za registraciju)

- (1) Naziv je prihvatljiv za registraciju kao garantovano tradicionalni specijalitet kada opisuje specifičan proizvod ili prehrambeni proizvod u smislu načina proizvodnje, prerade ili sastava odgovarajućeg tradicionalnog postupka za taj proizvod ili prehrambeni proizvod ili se proizvodi od sirovina ili sastojaka koji se tradicionalno koriste.
- (2) Naziv za registraciju kao garantovano tradicionalni specijalitet mora biti tradicionalno korišten za označivanje specifičnog proizvoda ili opisivati tradicionalna svojstva ili specifična svojstva proizvoda.
- (3) Naziv se ne može registrirati ako se odnosi samo na tvrdnje općenite prirode koje se upotrebljavaju za određene proizvode ili tvrdnje u skladu sa posebnim propisima u Bosni i Hercegovini.
- (4) Naziv garantovano tradicionalnog specijaliteta se registrira na njegovom izvornom pismu, u slučaju kada izvorno pismo nije latinica, zajedno sa nazivom na izvornom pismu se registruje i njegov prijepis na latinici.

Član 26.

(Specifikacija proizvoda)

- (1) Garantovano tradicionalni specijalitet mora biti u skladu sa specifikacijom proizvoda koja uključuje:
 - a) naziv koji se predlaže za registraciju na jezicima u upotrebi u Bosni i Hercegovini;
 - b) opis proizvoda uključujući njegova glavna fizikalna, hemijska, mikrobiološka i senzorska svojstva, koja dokazuju njegov specifičan karakter potreban za identifikaciju proizvoda;
 - c) opis metode proizvodnje koju proizvođač mora slijediti, uključujući, tamo gdje je to prikladno, prirodu i svojstva upotrijebljenih sirovina ili sastojaka i metodu pripreme proizvoda;

d) ključne elemente koji određuju tradicionalna svojstva proizvoda.

(2) Specifikacija proizvoda za garantovano tradicionalni specijalitet sadržava informacije propisane Aneksom IX ovog Pravilnika.

Član 27.

(Posebna pravila za opis proizvoda i metode proizvodnje)

(1) U opisu proizvoda se navode samo svojstva potrebna za identifikaciju proizvoda i njegovih specifičnih svojstava.

(2) U opisu proizvoda se ne ponavljaju opće obaveze, posebno ne tehničke značajke svojstvene svim proizvodima tog tipa ni pripadajući obavezni pravni zahtjevi.

(3) Opis metode proizvodnje kao i tradicionalni postupci navode se samo ako se trenutno, odnosno još uvijek primjenjuju.

(4) Opisuje se samo metoda koja je potrebna za dobivanje posebnog proizvoda, na način koji omogućuje reprodukciju proizvoda bilo gdje.

(5) Ključni elementi koji dokazuju tradicionalni karakter proizvoda uključuju glavne elemente koji su ostali nepromijenjeni sa preciznim i dobro utemeljenim upućivanjima.

Član 28.

(Postupak za priznavanje posebnih svojstava i dodjelu oznake)

(1) Postupak za priznavanje posebnih svojstava i dodjelu oznake pokreće sa zahtjevom za registraciju koji se podnosi Agenciji.

(2) Postupak iz stava (1) ovoga člana provodi Agencija uz pomoć Komisije za dodjelu oznake „garantovano tradicionalni specijalitet“ (u daljnjem tekstu: Komisija) koju imenuje Vijeće ministara Bosne i Hercegovine, na prijedlog Agencije.

(3) Komisiju čine po jedan predstavnik Agencije, Instituta za intelektualno vlasništvo Bosne i Hercegovine, Vanjskotrgovinske komore Bosne i Hercegovine i dva predstavnika fakulteta prehrambene tehnologije i/ili veterinarske medicine.

(4) Predsjednik Komisije iz stava (2) ovog člana je predstavnik Agencije.

Član 29.

(Poslovi Komisije)

Komisija iz člana 28. stav (2) ovog Pravilnika, obavlja sljedeće poslove:

a) vrši stručni pregled zahtjeva za registraciju oznake „garantovano tradicionalni specijalitet“ i predlaže Agenciji donošenje rješenja o registraciji oznake;

- b) razmatra pristigle prigovore;
- c) predlaže dopunu zahtjeva za registraciju, oznake „garantovano tradicionalni specijalitet“;
- d) razmatra zahtjeve za naknadnu izmjenu i dopunu specifikacije;
- e) razmatra zahtjeve za pravo upotrebe registrirane oznake „garantovano tradicionalni specijalitet“.

Član 30.

(Podnositelj zahtjeva za registraciju oznake garantovano tradicionalni specijaliteti)

- (1) Zahtjev za registraciju oznake garantovano tradicionalnog specijaliteta (u daljem tekstu: zahtjev za registraciju) za pojedini poljoprivredni ili prehrambeni proizvod se podnosi od strane zainteresovane grupe.
- (2) Izuzetno, pojedini proizvođač i/ili prerađivač, neovisno o tomu je li fizička ili pravna osoba, može podnijeti zahtjev za registraciju iz stava (1) samo ako je u vrijeme podnošenja toga zahtjeva jedini proizvođač, odnosno prerađivač prehrambenog ili poljoprivrednog proizvoda za koji je spreman podnijeti zahtjev za registraciju oznake garantovano tradicionalni specijalitet.
- (3) U slučaju iz stava (2) ovoga člana pojedina fizička ili pravna osoba koja je podnijela zahtjev za registraciju oznake predstavlja grupu u smislu člana 4. stava (1) tačka b) ovoga Pravilnika.
- (4) Podnositelj zahtjeva iz st. (1) i (2) ovoga člana može podnijeti zahtjev za registraciju samo za poljoprivredne ili prehrambene proizvode koje proizvodi ili prerađuje.
- (5) Podnositelji zahtjeva iz st. (1) i (2) ovoga člana, nakon što registriraju određeni poljoprivredni ili prehrambeni proizvod u Bosni i Hercegovini, u skladu s ovim Pravilnikom, mogu podnijeti zahtjev za registraciju oznake garantovano tradicionalni specijalitet na nivou Evropske unije.
- (6) Zahtjev iz stava (5) ovoga člana šalje se Evropskoj komisiji putem Agencije.
- (7)

Član 31.

(Zahtjev za registraciju garantovano tradicionalnog specijaliteta)

- (1) Podnositelj zahtjeva za registraciju naziva kao garantovano tradicionalnog poljoprivrednog ili prehrambenog specijaliteta (u daljem tekstu: zahtjev za registraciju) potrebno je da Agenciji dostavi:
 - a) popunjen obrazac zahtjeva za registraciju naziva iz Aneksa X ovog Pravilnika;
 - b) kopiju dokaza o registraciji grupe;
 - c) izjavu nadležnog organa grupe o usvojenoj odluci o zaštiti naziva poljoprivrednog ili prehrambenog proizvoda kao garantovano tradicionalnog specijaliteta;

- d) punomoć (ukoliko grupu zastupa ovlašteni zastupnik ili punomoćnik), ovjerenu od strane javnog bilježnika;
- e) specifikaciju proizvoda u skladu sa članom 26. ovog Pravilnika i popunjen obrazac iz Aneksa IX ovog Pravilnika;
- f) potvrdu certifikacijskog tijela da se može vršiti certifikacija.

(2) Zahtjev za registraciju sa dokumentacijom iz stava (1) ovog člana dostavlja se Agenciji putem pošte i elektronskim putem.

Član 32.

(Postupak po prijemu zahtjeva za registraciju)

- (1) Agencija po prijemu zahtjeva iz člana 31. ovog Pravilnika formalno-pravno vrši pregled zahtjeva.
- (2) Ako je zahtjev formalno nepotpun Agencija traži otklanjanje nedostataka i dopunu zahtjeva od podnositelja zahtjeva u roku od 30 dana.
- (3) Agencija po prijemu potpunog zahtjeva iz člana 31. ovog Pravilnika zahtjev upućuje Komisiji koja vrši njegovu stručnu provjeru.
- (4) Rok za provjeru zahtjeva iz stava (3) ovog člana je 6 mjeseci od datuma podnošenja zahtjeva prema Agenciji.
- (5) Ukoliko je potrebno Agencija od podnositelja zahtjeva može tražiti pojašnjenje elemenata iz specifikacije kao i naložiti dopunu specifikacije od podnositelja zahtjeva u roku od 30 dana.
- (6) Izuzetno od st. (2) i (5) ovog člana rok se produžava na zahtjev podnositelja zahtjeva za najviše dva mjeseca.
- (7) Ako podnositelj zahtjeva ne dopuni zahtjev u propisanom roku, Agencija će rješenjem zahtjev odbaciti.
- (8) Ako su ispunjeni svi uslovi propisani ovim Pravilnikom na prijedlog Komisije Agencija prihvata zahtjev za registraciju.
- (9) Obavijest o zahtjevu se objavljuje u Službenom glasniku BiH, a specifikacija na web stranici Agencije.

Član 33.
(Prigovor)

- (1) Svako fizičko ili pravno lice može podnijeti prigovor na objavljeni zahtjev za registraciju oznake u roku od tri mjeseca računajući od dana objavljivanja sadržaja zahtjeva u „Službenom glasnik BiH“.
- (2) Uz prigovor iz stava (1) ovog člana prilažu se dokazi o razlozima prigovora. Komisija provjerava da li izjava sadrži razloge i opravdanje za prigovor.
- (3) Prigovor je dopušten samo ako ga je Komisija primila u vremenskom roku iz stava (1) ovog člana Pravilnika, i to:
 - a) ako osporavani zahtjev nije u skladu sa uslovima koji se navode u čl. 4., 25. i 41. ovog Pravilnika, ili
 - b) ako dokaže da je korištenje naziva zakonito, poznato i ekonomski značajno za slične poljoprivredne ili prehrambene proizvode.
- (4) Izjava o prigovoru mora biti sastavljena u skladu s obrascem Aneksa IV. ovog Pravilnika.
- (5) Rok za podnošenje prigovora iz stava (1) ovog člana ne može se produžavati.
- (6) Ako Komisija ne primi prigovor u navedenom roku, predlaže Agenciji da registriira naziv i objavi ga u „Službenom glasniku BiH“.

Član 34.
(Postupak po prigovoru)

- (1) Komisija iz člana 28. stav (2) ovog Pravilnika rješava o prigovoru.
- (2) Ako Komisija utvrdi da prigovor ne ispunjava formalne uslove propisane članom 33. ovog Pravilnika, prigovor se zaključkom odbacuje o čemu se obavještava podnosilac zahtjeva i podnosilac prigovora, te se postupak za registraciju nastavlja.
- (3) Ako prigovor ispunjava formalne uslove iz člana 33. ovog Pravilnika, Komisija dostavlja prigovor s priloženim dokazima podnosiocu zahtjeva za registraciju i poziva ga da u roku od 30 dana dostavi pisano izjašnjenje o prigovoru.
- (4) Rok za izjašnjavanje na prigovor može se, na zahtjev podnosioca zahtjeva za registraciju, iz opravdanih razloga produžiti za još najviše 30 dana.
- (5) Ako podnosilac zahtjeva za registraciju u propisanom roku ne dostavi izjašnjavanje na prigovor, donosi se rješenje o odbijanju zahtjeva.

Član 35.
(Ispitivanje osnovanosti prigovora)

- (1) Ako se podnosilac zahtjeva za registraciju izjasni na podneseni prigovor, Komisija ispituje osnovanost prigovora u okviru razloga zbog kojih je podnesen.
- (2) Ako je prigovor osnovan, Komisija poziva zainteresirane strane da učestvuju u odgovarajućim konsultacijama.
- (3) Ako zainteresirane strane postignu sporazum u roku od tri mjeseca od dana pozivanja, one obavještavaju Komisiju o svim faktorima koji su omogućili da sporazum bude postignut.
- (4) Ako objavljeni podaci u skladu s Aneksom X. nisu izmijenjeni ili su izmijenjeni neznatno, Komisija postupa u skladu s članom 33. stav (6) ovog Pravilnika. U suprotnom, Komisija ponavlja postupak koji se navodi u članu 32. ovog Pravilnika.
- (5) Kada je postupak koji se navodi u stavu (2) ovog člana završen, podnosilac šalje rezultate konsultacija Komisiji u roku od 30 dana koristeći obrazac Aneksa V. ovog Pravilnika.
- (6) Ako nema dogovora, Komisija predlaže Agenciji daljnje postupanje u pogledu zahtjeva za registraciju uvažavajući mišljenje zainteresiranih strana.
- (7) Agencija donosi rješenje o odbijanju zahtjeva za registraciju oznake ako utvrdi da je prigovor osnovan i o tome obavještava zainteresirane strane.
- (8) Agencija donosi rješenje o odbijanju prigovora ako utvrdi da je prigovor neosnovan i o tome obavještava zainteresirane strane.

Član 36.
(Okončanje postupka i upis u Registar)

- (1) Na osnovu provedenog postupka za registraciju oznake i prijedloga Komisije, Agencija donosi rješenje o upisu u Registar (u daljnjem tekstu: rješenje).
- (2) Oznaka se upisuje u Registar danom pravosnažnosti rješenja.
- (3) Registrirana oznaka objavljuje se u „Službenom glasniku BiH“ i na web-stranici Agencije.
- (4) Svako zainteresirano lice može zatražiti od Agencije uvid u specifikaciju proizvoda kojem su priznata posebna svojstva i dodijeljena oznaka.

Član 37.
(Izmjene specifikacije)

- (1) Zahtjev za odobrenje izmjene specifikacije može podnijeti grupa sa legitimnim interesom.

(2) Zahtjevi za odobrenje veće izmjene specifikacije proizvoda za zaštićene oznake garantovano tradicionalnog specijaliteta sastavljaju se u skladu s obrascem iz Aneksa XI u skladu sa zahtjevima iz člana 31. Pravilnika.

(3) Izmijenjena specifikacija proizvoda sastavlja se u skladu s obrascem iz Aneksa IX ovog Pravilnika.

(4) Ako predložene veće izmjene specifikacije uključuju jednu ili više izmjena provodi se postupak utvrđen čl. 30., 31., 32., 33., 34. i 35. ovog Pravilnika.

(5) Zahtjev za odobrenje manje izmjene sastavlja se u skladu s obrascem iz Aneksa VII ovog Pravilnika.

(6) Da bi se izmjena smatrala manjom u slučaju sistema kvalitete zaštite oznaka garantovano tradicionalnog specijaliteta treba da:

- a) se ne odnosi na ključna obilježja proizvoda;
- b) ne uvodi važne promjene metoda proizvodnje; ili
- c) ne uključuje promjenu naziva ili bilo kojeg dijela naziva proizvoda.

(7) Ako su predložene izmjene manje Komisija odobrava ili odbija zahtjev, bez provođenja postupka iz stava (4) ovog člana.

(8) Izmjena specifikacije objavljuje se u „Službenom glasniku BiH“ i na web stranici Agencije.

Član 38. **(Označavanje)**

(1) Samo proizvođači i/ili prerađivači koji ispunjavaju uslove specifikacije i koji su upisani u Registar korisnika oznake iz člana 36. stav (2) ovog Pravilnika mogu, pri označavanju, oglašavanju ili na drugoj dokumentaciji koja se odnosi na prehrambeni ili poljoprivredni proizvod, navesti oznaku.

(2) Prehrambeni ili poljoprivredni proizvodi iz stava (1) ovog člana pri označavanju moraju, pored registriranog naziva, imati vidljivu oznaku „GARANTOVANO TRADICIONALNI SPECIJALITET“.

Član 39. **(Registar garantovano tradicionalnih specijaliteta)**

Agencija uspostavlja i održava ažurirani javno dostupan registar garantovano tradicionalnih specijaliteta, priznatih prema ovom sistemu.

Član 40.
(Nazivi, znakovi i oznake)

- (1) Naziv registriran kao garantovano tradicionalni specijalitet može upotrebljavati svaki privredni subjekat koji stavlja na tržište proizvod koji je u skladu s odgovarajućom specifikacijom.
- (2) Pravilnikom o izgledu i načinu korištenja znaka oznake originalnosti, oznake geografskog porijekla i oznake tradicionalnog ugleda hrane ("Službeni glasnik BiH", broj 81/12) definisani znakovi Bosne i Hercegovine kako bi informirali javnost o garantovano tradicionalnim specijalitetima.
- (3) Na proizvode porijeklom iz Bosne i Hercegovine koji se stavljaju na tržište kao garantovano tradicionalni specijaliteti registrirani u skladu s ovim Pravilnikom, i pripadajući znak iz stava (2) stavlja se na etiketu.
- (4) Naziv proizvoda treba se nalaziti u istom vidnom polju. Oznaka „garantovano tradicionalni specijalitet” ili odgovarajuća kratica „GTS” se može također nalaziti na etiketi.
- (5) Kod označavanja garantovano tradicionalnih specijaliteta proizvedenih izvan Bosne i Hercegovine, upotreba znaka navedenog u stavu (2) nije obavezna.

Član 41.
(Ograničenja upotrebe registriranih naziva)

Registrirani nazivi zaštićeni su od svake zloupotrebe, oponašanja ili podsjećanja i svakog drugog postupka koji bi mogao dovesti potrošača u zabludu.

Poglavlje III

NEOBAVEZNI IZRAZI KVALITETE

Član 42.

(Sistem neobaveznih izraza kvalitete)

Sistem neobaveznih izraza kvalitete uspostavlja se kako bi se proizvođačima na tržištu Bosne i Hercegovine omogućilo lakše pružanje informacija o svojstvima poljoprivrednih proizvoda s dodanom vrijednost

Član 43.

(Kriteriji)

(1) Neobavezni izrazi kvalitete moraju ispunjavati sljedeće kriterije:

- a) Izraz se odnosi na karakteristiku jedne ili više kategorija proizvoda ili na svojstvo proizvodnje ili prerade koje se primjenjuje u određenim područjima;
- b) upotreba izraza povećava vrijednost proizvodu u usporedbi s proizvodima sličnog tipa.

(1) Neobavezni izrazi o kvaliteti kojim se opisuju tehničke kvalitete proizvoda s ciljem provođenja obaveznih tržišnih standarda i čija namjera nije informiranje potrošača o kvaliteti tih proizvoda isključuju se iz ovog sistema.

(3) Neobavezni izrazi o kvaliteti isključuju neobavezne rezervirane izraze koji podržavaju i dopunjuju specifične tržišne standarde utvrđene na osnovu sektorske kategorije ili kategorije proizvoda.

Član 44.

Planinski proizvod

(1) Izraz „planinski proizvod” uvodi se kao neobavezni izraz o kvaliteti. Taj izraz se koristi samo za opisivanje proizvoda namijenjenih za prehranu ljudi navedenih Aneksu I, dio A s obzirom na koje:

- a) i sirovine i hrana za životinje dolaze pretežno iz planinskih područja;
- b) u slučaju prerađenih proizvoda, prerada se također odvija u planinskim područjima.

(2) Planinska područja u Bosni i Hercegovini trebaju ispuniti sljedeće kriterije:

- a) prosječna nadmorska visina od 700 m;
- b) prosječan nagib od najmanje 20%; najmanje 50% površine mora zadovoljiti kriterije nagiba; ili
- c) prosječna visina 500 m, a prosječna nagib od najmanje 15%.

Član 45.
(Proizvodi životinjskog porijekla)

- (1) Oznaka „planinski proizvod” može se primjenjivati na proizvode životinja na planinskim područjima i koji se prerađuju na tim područjima.
- (2) Oznaka „planinski proizvod” može se primjenjivati na proizvode dobivene od životinja koje su najmanje posljednje dvije trećine svog života uzgajane na tim planinskim područjima ako se proizvodi prerađuju na tim područjima.
- (3) Oznaka „planinski proizvod” može se primjenjivati na proizvode dobivene od sezonski premještenih životinja koje su uzgajane najmanje jednu četvrtinu svog života u sezonskoj ispaši na pašnjacima na planinskim područjima.

Član 46.
(Stočna hrana)

- (1) Stočna hrana za životinje iz uzgoja pretežno potiče iz planinskih područja ako udio godišnje prehrane životinja koji se ne može proizvesti na planinskim područjima, izražen kao postotak suhe tvari, ne premašuje 50 % i, u slučaju preživača, 40 %.
- (2) U pogledu svinja, udio stočne hrane koji se ne može proizvesti na planinskim područjima, izražen u postotku suhe tvari, ne smije premašiti 75 % godišnje prehrane životinja.
- (3) Stav (1) ovog člana ne primjenjuje se na stočnu hranu za sezonski premještene životinje iz člana 45. stav (3) ako su uzgajane izvan planinskih područja.

Član 47.
(Pčelarski proizvodi)

- (1) Oznaka „planinski proizvod” može se primjenjivati na proizvode pčelarstva ako su pčele prikupile nektar i pelud samo na planinskim područjima.
- (2) Šećer kojim se hrane pčele ne treba da potiče iz planinskih područja.

Član 48.
(Proizvodi biljnog porijekla)

Oznaka „planinski proizvod” može se primjenjivati na proizvode biljnog porijekla samo ako je bilje uzgojeno na planinskim područjima.

Član 49.
(Sastojci)

Kada se upotrebljavaju u proizvodima iz čl. 45. i 48., sljedeći sastojci mogu poticati s mjesta izvan planinskih područja, uz uslov da čine više od 50 % ukupne težine sastojaka:

- a) ostali proizvodi koji nisu navedeni u Aneksu I, dio A ovog Pravilnika;
- b) začinsko bilje, začini i šećer.

Član 50.
(Prerada izvan planinskih područja)

(1) Sljedeće aktivnosti prerade mogu se obavljati izvan planinskih područja, uz uvjet da udaljenost od planinskog područja o kojem je riječ ne premašuje 20 km:

- a) postupci prerade za proizvodnju mlijeka i mliječnih proizvoda u pogonima za preradu;
- b) klanje životinja i rezanje i otkoštavanje trupaca;
- c) prešanje maslinovog ulja.

PREDNACRT

DIO TREĆI - ZAJEDNIČKE ODREDBE

Poglavlje I.

UTVRĐIVANJE USKLAĐENOSTI I SLUŽBENE KONTROLE

Član 51.

(Utvrdivanje usklađenosti sa specifikacijom proizvoda)

- (1) Za zaštićene oznake originalnosti, zaštićene oznake geografskog porijekla i garantovano tradicionalni specijalitet koje označavaju proizvode, provjeru usklađenosti sa specifikacijom provodi jedno ili više kontrolnih tijela koja djeluju kao certifikacijska tijela ovlaštena od Vijeća ministara Bosne i Hercegovine, na prijedlog Agencije.
- (2) Certifikacijska tijela iz stava (1) ovog člana moraju biti akreditovana od Instituta za akreditiranje Bosne i Hercegovine ili drugog međunarodno ovlaštenog akreditacijskog tijela prema zahtjevima standarda BAS EN ISO/IEC 17065:2014.
- (3) Certifikacijska tijela koja potvrđuju usklađenost sa specifikacijom moraju ponuditi odgovarajuće garancije objektivnosti i nepristranosti te imati na raspolaganju osposobljene stručnjake i resurse potrebne za obavljanje potvrđivanja usklađenosti sa specifikacijom,
- (4) Troškove utvrđivanja usklađenosti snose podnositelji zahtjeva ili korisnici oznaka.
- (6) Popis ovlaštenih certifikacijskih tijela objavljuje se u „Službenom glasniku BiH“.
- (7) Nadzor nad radom certifikacijskih tijela provode nadležni inspekcijski organi.

Član 52.

(Službena kontrola i inspekcijski nadzor)

Službena kontrola i inspekcijski nadzor provode se u skladu s važećim propisima o čemu nadležni inspekcijski organi jednom godišnje dostavljaju izvještaj Agenciji.

Član 53.

(Izuzeci)

- (1) U mjeri u kojoj porijeklo u cijelosti iz određenog geografskog područja nije tehnički izvedivo, hrana za životinje porijeklom izvan tog područja može se dodati pod uslovom da nema uticaja na kvalitet proizvoda ili njegove bitne karakteristike.
- (2) Hrana za životinje porijeklom izvan određenog geografskog područja u svakom slučaju ne prelazi 50 % suhe tvari na godišnjem nivou.

(3) Sva ograničenja o porijekla sirovina u specifikaciji samog proizvoda, čiji je naziv registriran kao zaštićena oznaka geografskog porijekla, opravdana su u odnosu na vezu iz člana 7. tačka g) alineja 2.

(4) Specifikacija proizvoda za garantovano tradicionalne specijalitete iz člana 26. ovog Pravilnika sažeta je i ne prelazi više od 5 000 riječi, osim u propisano opravdanim slučajevima.

(5) Postupak utvrđen u čl. 11. do 16. i 31. do 36. ne primjenjuje se na izmjene koje se odnose na privremenu promjenu specifikacije proizvoda koja proizlazi iz uvođenja obaveznih sanitarnih i fitosanitarnih mjera od strane nadležnih organa ili u vezi s prirodnim katastrofama ili nepovoljnim vremenskim uslovima koje su službeno priznali nadležni organi. Te se izmjene Agenciji dostavljaju zajedno s njihovim razlozima najkasnije u roku od dvije sedmice nakon odobrenja. Privremene izmjene specifikacije proizvoda Agenciji dostavljaju nadležni organi za oblast poljoprivrede iz entiteta i/ili kantona i Brčko distrikta Bosne i Hercegovine u kome je udruženje registrovano. Nadležni organi u svakom priopćenju koje se odnosi na privremene izmjene dostavljaju dokaze o sanitarnim i fitosanitarnim mjerama i kopiju akta o priznavanju prirodne katastrofe ili nepovoljnih vremenskih uvjeta. Agencija objavljuje navedene izmjene. Obavijest o privremenoj izmjeni podnosi se na obrascu iz Aneksa XII ovog Pravilnika.

Član 54.

(Nazivi upisani u registre)

(1) Nazivi upisani u Registar oznaka originalnosti i oznaka geografskog porijekla prije stupanja na snagu ovog Pravilnika automatski se upisuju u Registar iz člana 16. ovog Pravilnika, te se postojeće specifikacije smatraju specifikacijama iz člana 7. ovog Pravilnika.

(2) Nazivi upisani u Registar oznaka tradicionalnog ugleda prije stupanja na snagu ovog Pravilnika automatski se upisuju u Registar iz člana 36. ovog Pravilnika, te se postojeće specifikacije smatraju specifikacijama iz člana 26. ovog Pravilnika.

Član 55.

(Poništenje)

(1) Agencija može, po službenoj dužnosti ili na zahtjev bilo koje fizičke ili pravne osobe s legitimnim interesom koji se podnosi na obrascu iz Aneksa VIII ovog Pravilnika, poništiti zaštićene oznake originalnosti, zaštićene oznake geografskog porijekla ili garantovano tradicionalnog specijaliteta u sljedećim slučajevima:

- a) kada nije osigurana usklađenost s uslovima specifikacije;
- b) kada najmanje sedam godina niti jedan proizvod zaštićen oznakom garantovano tradicionalni specijalitet, zaštićen oznakom originalnosti ili zaštićen oznakom geografskog porijekla nije stavljen na tržište.

(2) Agencija može, na zahtjev proizvođača proizvoda koji se stavlja na tržište pod registriranim nazivom, poništiti odgovarajuću registraciju.

(3) Agencija donosi Rješenje o poništenju zaštita oznaka iz st. (1) i (2) ovog člana, na osnovu čega se vrši brisanje iz Registra.

PREDNACRT

Poglavlje II

IZNIMKE ZA ODREĐENO PRETHODNO KORIŠTENJE

Član 56. (Generički nazivi)

(1) Pravilnik ne utiče na upotrebu generičkih naziva u Bosni i Hercegovini, čak i u slučaju da je generički naziv dio naziva koji je zaštićen prema sistemu kvalitete.

(2) Kako bi se utvrdilo je li neki naziv postao generički ili nije, potrebno je voditi računa o svim važnim faktorima, a posebno o:

- a) postojećem stanju u područjima potrošnje;
- b) propisima na snazi.

Član 57. (Biljne sorte i životinjske pasmine)

(1) Ovaj Pravilnik ne sprječava stavljanje na tržište proizvoda čija etiketa uključuje naziv ili izraz zaštićen ili rezerviran prema sistemu kvalitete opisanom u djelu II ovog Pravilnika koji sadrži ili uključuje naziv biljke sorte ili životinjske pasmine, pod uslovom da je udovoljeno sljedećim uslovima:

- a) taj proizvod se sastoji ili je dobiven iz označene sorte ili pasmine;
- b) potrošači nisu dovedeni u zabludu;
- c) korištenje naziva sorte ili pasmine predstavlja pravedno tržišno natjecanje;
- d) korištenje ne predstavlja iskorištavanje ugleda zaštićenog izraza; te
- e) za sisteme kvalitete opisane u Dijelu II, Poglavlje I, ovog Pravilnika proizvodnja i marketing proizvoda su se proširili izvan područja iz kojeg potiče prije datuma podnošenja zahtjeva za registraciju oznake geografskog porijekla.

Član 58. (Odnos s intelektualnim vlasništvom)

Sistemi kvalitete opisani u Dijelu II, poglavlja II i III ovog Pravilnika primjenjuju se ne dovodeći u pitanje važeće propise iz oblasti intelektualnog vlasništva u Bosni i Hercegovini, te posebno ona pravila koja se odnose na oznake porijekla, oznake geografskog porijekla i žigove, te prava dodijeljena prema tim važećim propisima.

DIO ČETVRTI - SISTEMI KVALITETE OZNAKA I ZNAKOVA TE ULOGA PROIZVOĐAČA

Član 59. (Zaštita oznaka i znakova)

Oznake, kratice i znakovi koji se odnose na sisteme kvalitete mogu se koristiti samo u vezi s proizvodima proizvedenim u skladu s pravilima o sistemima kvalitete na koje se primjenjuju. To se posebno odnosi na sljedeće oznake, kratice i znakove:

- a) „zaštićena oznaka originalnosti” „zaštićena oznaka geografskog porijekla”, „oznaka geografskog porijekla”, „ZOO”, „ZOGP” i s njima povezani znakovi, kako je navedeno u Dijelu II, Poglavlje I;
- b) „garantovano tradicionalni specijalitet”, „GTS” i s njom povezani simbol, kako je navedeno u Dijelu II, Poglavlje II;
- c) planinski proizvod kako je navedeno u Dijelu II, Poglavlje III.

Član 60. (Uloga grupa)

Ne dovodeći u pitanje posebne propise o organizacijama proizvođača i međugranskim organizacijama, grupa ima pravo:

- a) doprinositi da su kvalitet, ugled i autentičnost njihovih proizvoda garantovani na tržištu nadziranjem upotrebe naziva u trgovini te, ako je potrebno, obavještavajući kontrolno tijelo iz člana 51. ovog Pravilnika;
- b) poduzeti mjere za osiguranje odgovarajuće pravne zaštite za zaštićene oznake originalnosti ili zaštićene oznake geografskog porijekla i prava intelektualnog vlasništva koja su s njima direktno povezana;
- c) razvijati informativne i reklamne djelatnosti koje su usmjerene na obavještavanje potrošača o svojstvima koja proizvodu dodaju vrijednost;
- d) razvijati djelatnosti radi osiguranja usklađenosti proizvoda s njegovom specifikacijom;
- e) poduzeti mjere za poboljšanje efikasnosti sistema, uključujući razvoj ekonomskog stručnog znanja, izradom ekonomskih analiza, širenja privrednih informacija o sistemu i savjetovanje proizvođača;
- f) poduzeti mjere za poboljšanje vrijednosti proizvoda te, kada je potrebno, poduzeti korake za sprječavanje ili suzbijanje svih mjera koje su, ili bi mogle biti, kritične za narušavanje ugleda tih proizvoda.

Član 61.
(Pravo na korištenje sistema)

(1) Neophodno je osigurati da svaki privredni subjekt koji je u skladu s pravilima sistema kvalitete iz Dijela II Poglavlje I i II ovog Pravilnika ima pravo biti obuhvaćen provjerom usklađenosti utvrđenom prema članu 51. ovog Pravilnika.

(2) Privredni subjekti koji pripremaju i skladište proizvod koji se stavlja na tržište kao dio sistema garantovano tradicionalnog specijaliteta, zaštićene oznaka originalnosti ili zaštićene oznake geografskog porijekla ili koji stavljaju te proizvode na tržište također podliježu kontrolama iz Dijela III, poglavlja I ovog Pravilnika.

(3) Neophodno je osigurati da su privredni subjekti koji su voljni pridržavati se pravila sistema kvalitete iz Dijela II, poglavlja II i III ovog Pravilnika to i u mogućnosti, te da se ne moraju suočavati s preprekama sudjelovanju koje su diskriminirajuće ili na drugi način nisu objektivne.

Član 62.
(Naknade)

Troškove provođenja sistema utvrđivanja usklađenosti kontrole uključujući one nastale prilikom zaprimanja zahtjeva za registraciju, prigovora, zahtjeva za izmjenama te zahtjeva za poništenje iz ovog Pravilnika snosi proizvođač odnosno prerađivač poljoprivrednog ili prehrambenog proizvoda.

DIO PETI – PRELAZNE I ZAVRŠNE ODREDBE

Član 63. **(Prestanak važenja propisa)**

Danom početka primjene ovog Pravilnika prestaju da važe Pravilnik o oznakama originalnosti i oznakama geografskog porijekla hrane („Službeni glasnik BiH“, broj 27/10) i Pravilnik o tradicionalnom ugledu hrane („Službeni glasnik BiH“, broj 27/10).

Član 64. **(Stupanje na snagu)**

Ovaj Pravilnik stupa na snagu osmog dana od dana objavljivanja u „Službenom glasniku BiH“.

Predsjedavajući
Vijeća ministara BiH
Denis Zvizdić

VM broj _____/17
_____2017. godine
Sarajevo

ANEKS I

KATEGORIJE PROIZVODA

1. Poljoprivredni proizvodi namijenjeni prehrani ljudi

- Razred 1.1. Svježe meso (i nusproizvodi klanja),
- Razred 1.2. Mesni proizvodi (kuhani, soljeni, dimljeni itd.),
- Razred 1.3. Sirevi,
- Razred 1.4. Ostali proizvodi životinjskog porijekla (jaja, med, različiti mliječni proizvodi osim maslaca itd.),
- Razred 1.5. Ulja i masnoće (maslac, margarin, ulje itd.),
- Razred 1.6. Voće, povrće i žitarice, u prirodnom stanju ili prerađeni,
- Razred 1.7. Svježa riba, mekušci i rakovi te proizvodi dobiveni od njih,
- Razred 1.8. Ostali proizvodi (začini itd.).

2. Drugi Poljoprivredni i prehrambeni proizvodi

I. Oznake originalnosti i oznake geografskog porijekla

- Razred 2.1. Pivo,
- Razred 2.2. Čokolada i čokoladni proizvodi,
- Razred 2.3. Hljeb, fino pecivo, kolači, slastice, keksi i drugi pekarski proizvodi,
- Razred 2.4. Napitci proizvedeni od biljnih ekstrakata,
- Razred 2.5. Tjestenina,
- Razred 2.6. So,
- Razred 2.7. Prirodne gume i smole,
- Razred 2.8. Senf,
- Razred 2.9. Sijeno,
- Razred 2.10. Eterična ulja,
- Razred 2.11. Pluto,
- Razred 2.12. Košenil,
- Razred 2.13. Cvijeće i ukrasno bilje,
- Razred 2.14. Pamuk,
- Razred 2.15. Vuna,
- Razred 2.16. Pleter,
- Razred 2.17. Trljan lan,
- Razred 2.18. Koža,
- Razred 2.19. Krzno,
- Razred 2.20. Perje.

II. Garantovano tradicionalni specijalitet

- Razred 2.21. Gotovi obroci,
- Razred 2.22. Pivo,
- Razred 2.23. Čokolada i čokoladni proizvodi,
- Razred 2.24. Hljeb, fino pecivo, kolači, slastice, keksi i drugi pekarski proizvodi,
- Razred 2.25. Napitci proizvedeni od biljnih ekstrakata,
- Razred 2.26. Tjestenina,
- Razred 2.27. So.

PREDNACRT

ANEKS II

ZAHTJEV ZA REGISTRACIJU NAZIVA POLJOPRIVREDNOG ILI PREHRAMBENOG PROIZVODA ZAŠTIĆENOM OZNAKOM ORIGINALNOSTI ILI ZAŠTIĆENOM OZNAKOM GEOGRAFSKOG PORIJEKLA

1. NAZIV POLJOPRIVREDNOG ILI PREHRAMBENOG PROIZVODA

(za koji se traži zaštita naziva oznake):

2. OZNAKA ZA KOJU SE PODNOSI ZAHTJEV (staviti križić X):

- oznaka originalnosti
 oznaka geografskog porijekla

3. PODACI O GRUPI – PODNOSITELJU ZAHTJEVA:

Naziv grupe	
Pravni status grupe	
Broj članova grupe	
Adresa grupe	
Broj telefona, fax, e-mail	
Ime i prezime, adresa i broj telefona odgovorne osobe grupe koja podnosi zahtjev	
Ime i prezime, adresa opunomoćene osobe koja zastupa grupu koja podnosi zahtjev	

4. PRILOZI UZ ZAHTJEV (označiti priloženo – staviti križić X):

- Kopija dokaza o registraciji grupe
 Izjava nadležnog tijela grupe o usvojenoj odluci o zaštiti naziva poljoprivrednih ili prehrambenih proizvoda zaštićenom oznakom originalnosti ili zaštićenom oznakom geografskog porijekla
 Punomoć (dostaviti samo ako grupu zastupa ovlašteni zastupnik ili opunomoćenik, ovjerenu od javnog bilježnika)
 Specifi kacija proizvoda
 Jedinstveni dokument

Mjesto i datum:

Pečat i potpis odgovorne osobe:

ANEKS III
JEDINSTVENI DOKUMENT

[Upišite naziv kao u tački 1. u nastavku:] „...”

Broj za evidenciju Agencije za sigurnost hrane BiH

[Označite odabrano znakom „X”:]	<input type="checkbox"/> ZOO	<input type="checkbox"/> ZOGP
---------------------------------	------------------------------	-------------------------------

1. Naziv (nazivi) [ZOO-a ili ZOGP-a]

[Upišite naziv predložen za registraciju ili, u slučaju zahtjeva za odobrenje izmjene specifikacije proizvoda u skladu s članom 14. ovog Pravilnika, registrirani naziv.]

2. Opis poljoprivrednog ili prehrambenog proizvoda

2.1. Vrsta proizvoda [vidjeti Aneks I. ovog Pravilnika]

...

2.2. Opis proizvoda na koji se odnosi naziv iz tačke 1.

[Glavni elementi iz člana 7. tačka c) ovog Pravilnika. Za identifikaciju proizvoda koristite definicije i standarde koje se obično upotrebljavaju za taj proizvod. Pri opisivanju proizvoda usredotočite se na njegovu specifičnost i upotrebljavajte mjerne jedinice te uobičajene ili stručne elemente usporedbe, ne navodeći tehničke značajke svojstvene svim proizvodima tog tipa ni pripadajuće obavezne pravne zahtjeve koji se primjenjuju na sve proizvode tog tipa]

2.3. Hrana za životinje (samo za proizvode životinjskog porijekla) i sirovine (samo za prerađene proizvode)

[Za ZOO: potvrditi da hrana za životinje i sirovine potiču iz predmetnog područja. Ako hrana za životinje ili sirovine potiču izvan predmetnog područja, detaljno opišite te iznimke i navedite obrazloženja. Te iznimke moraju biti u skladu s pravilima donesenima u skladu s članom 53. ovog Pravilnika.

Za ZOGP: Navedite sve zahtjeve u pogledu kvalitete ili ograničenja u pogledu porijekla sirovina. Navedite obrazloženja za sva takva ograničenja. Ta ograničenja moraju biti u skladu s pravilima donesenima u skladu s članom 53. ovog Pravilnika i moraju biti opravdana u odnosu na vezu iz člana 7. tačka g) ovog Pravilnika.]

...

2.4. Posebni koraci u proizvodnji koji se moraju provesti u identificiranom geografskom području

[Navesti obrazloženja za sva ograničenja ili odstupanja.]

...

2.5 Posebna pravila za rezanje, ribanje, pakiranje itd. proizvoda na koji se odnosi registrirani naziv

[Ako ih nema, ostavite prazno. Za sva ograničenja navedite specifične razloge povezane s proizvodom.]

...

2.6. Posebna pravila za označivanje proizvoda na koji se odnosi registrirani naziv

[Ako ih nema, ostavite prazno. Za sva ograničenja navedite obrazloženje.]

...

3. Sažeta definicija geografskog područja

[Prema potrebi, umetnite kartu područja.]

...

4. Povezanost sa geografskim područjem

[Za ZOO: uzročno-posljedična veza između kvalitete ili svojstava proizvoda i geografskog okruženja, s prirodnim i ljudskim faktorima koji su mu svojstveni, uključujući, prema potrebi, elemente opisa proizvoda ili metode proizvodnje koji opravdavaju tu vezu.

Za ZOGP: uzročno-posljedična veza između geografskog porijekla i, prema potrebi, određene kvalitete, ugleda ili drugih svojstava proizvoda.

Izričito navedite na kojim se faktorima (ugled, određena kvaliteta, druga svojstva proizvoda) temelji uzročno-posljedična veza te navedite podatke samo za relevantne faktore uključujući, prema potrebi, elemente opisa proizvoda ili metode proizvodnje koji opravdavaju tu vezu.]

PRE

ANEKS IV
IZJAVA O PRIGOVORU

[Označite odabrano znakom „X”:]	<input type="checkbox"/> ZOO	<input type="checkbox"/> ZOGP	<input type="checkbox"/> GTS
---------------------------------	------------------------------	-------------------------------	------------------------------

1. Naziv proizvoda

[kako je objavljen u *Službenom glasniku BiH*]

...

2. Službeno upućivanje

[kako je objavljeno u *Službenom glasniku BiH*]

Broj i datum objave u Službenom glasniku BiH: ...

3. Podaci za kontakt

Osoba za kontakt:	Titula (G., Gđa...): ...	Ime: ...
-------------------	--------------------------	----------

Grupa/organizacija/pojedinac: ...

Služba: ...

Adresa: ...

Telefon + ...

Adresa e- pošte: ...

4. Razlozi za prigovor:

Za ZOO ZOGP:

- Nepoštovanje uslova utvrđenih članom 4. tč k) i l) i članom 7. ovog Pravilnika
- Registriranje naziva bilo bi u suprotnosti s članom 6. stav (2) ovog Pravilnika (biljna sorta ili životinjska pasmina)
- Registriranje naziva bilo bi u suprotnosti s članom 6. st. (3) i (4) ovog Pravilnika (naziv je potpuni ili djelomični homonim)
- Registriranje naziva bilo bi u suprotnosti s članom 6. stav (5) ovog Pravilnika (postojeći žig)
- Registriranje bi ugrozilo opstojnost naziva, žigova ili proizvoda kako je navedeno u članu 13. stav (2) tačka b) ovog Pravilnika.
- Naziv predložen za registriranje je generički naziv; treba navesti podatke kako je propisano u članu 13. stav (2) tačka c) ovog Pravilnika.

Za GTS:

- Nepoštovanje uslova utvrđenih članom 25. ovog Pravilnika.
- Registriranje naziva ne bi bilo u skladu sa članom 33. stav (3) tačka a) ovog Pravilnika.
- Naziv predložen za registriranje zakonit je, poznat i gospodarski značajan za slične poljoprivredne ili prehrambene proizvode (član 33. stav (3) tačka b) ovog Pravilnika).

5. Pojediniosti o prigovoru

Navedite propisno potkrijepljene razloge i opravdanja za prigovor.

Pojasnite i legitimni interes za prigovor. Izjava prigovora trebala bi biti potpisana i označena datumom.

PREDNACRT

ANEKS V

OBAVIJEST O ZAVRŠETKU SAVJETOVANJA NAKON POSTUPKA PRIGOVORA

[Označite odabrano znakom „X”:]	<input type="checkbox"/> ZOO	<input type="checkbox"/> ZOGP	<input type="checkbox"/> GTS
---------------------------------	------------------------------	-------------------------------	------------------------------

1. Naziv proizvoda

[kako je objavljen u *Službenom glasniku BiH*]

2. Službeno upućivanje [kako je objavljeno u *Službenom glasniku BiH*]

Broj i datum objave u *Službenom glasniku BiH*: ...

3. Rezultati savjetovanja

3.1. *Dogovor je postignut sa sljedećim podnosiocem (podnosiocima) prigovora:*

[priložiti kopiju dokumenta koji dokazuju da je postignut dogovor i sve faktore koji su omogućili dogovor]

3.2. *Dogovor nije postignut sa sljedećim podnosiocem (podnosiocima) prigovora:*

[obrazložiti razloge za ne postizanje dogovora]

4. Specifikacija proizvoda i jedinstveni dokument

4.1. *Specifikacija proizvoda izmijenjena je:*

... Da ⁽¹⁾	... Ne
-----------------------	--------

⁽¹⁾ Ako „Da”, priložite opis izmjena i izmijenjenu specifikaciju proizvoda.

4.2. *Jedinstveni dokument izmijenjen je (samo za ZOO i ZOGP):*

... Da ⁽²⁾	... Ne
-----------------------	--------

⁽²⁾ Ako „Da”, priložite kopiju izmijenjenog dokumenta.

5. Datum i potpis

[Ime:]

[Služba/organizacija:]

[Adresa]

[Telefon: +]

[Adresa e-pošte:]

ANEKS VI

ZAHTJEV ZA ODOBRENJE VEĆE IZMJENE SPECIFIKACIJE PROIZVODA ZA ZAŠTIĆENU OZNAKU ORIGINALNOSTI/ZAŠTIĆENU OZNAKU GEOGRAFSKOG PORIJEKLA

[Registrirani naziv] „...”

Broj za evidenciju Agencije za sigurnost hrane BiH

[Označite odabrano znakom „X”:]	<input type="checkbox"/> ZOO	<input type="checkbox"/> ZOGP
---------------------------------	------------------------------	-------------------------------

1. Grupa koja podnosi zahtjev i legitimni interes

[Navedite naziv, adresu, telefon i adresu e-pošte grupe koja predlaže izmjenu. Dostavite i izjavu u kojoj se objašnjava pravovaljani interes grupe koja podnosi zahtjev]

2. Rubrika specifikacije proizvoda na koju se primjenjuje izmjena

- Naziv proizvoda
- Opis proizvoda
- Geografsko područje
- Dokaz porijekla
- Metoda proizvodnje
- Poveznica
- Označavanje
- Ostalo [treba navesti]

3. Vrsta izmjene (izmjena)

- Izmjena specifikacije proizvoda registriranog ZOO-a ili ZOGP-a koja se ne može smatrati manjom.
- Izmjena specifikacije proizvoda registriranog ZOO-a ili ZOGP-a za koji nije objavljen jedinstveni dokument (ili istovrijedan dokument) koja se ne može smatrati manjom izmjenom.

4. Izmjena (izmjene)

[Za svaku rubriku označenu u prethodno navedenom odjeljku 2. navedite iscrpan opis i posebne razloge za svaku izmjenu. Za svaku izmjenu moraju se detaljno uporediti originalna specifikacija proizvoda i, prema potrebi, originalni jedinstveni dokument s predloženim izmijenjenim verzijama. Zahtjev za izmjenu mora biti samodostatan. Informacije navedene u ovom odjeljku moraju biti sveobuhvatne.]

ANEKS VII
ZAHTJEV ZA ODOBRENJE MANJE IZMJENE

[Registrirani naziv] „...”

Broj za evidenciju Agencije za sigurnost hrane BiH

[Označite odabrano znakom „X”:]	<input type="checkbox"/> ZOO	<input type="checkbox"/> ZOGP	<input type="checkbox"/> GTS
---------------------------------	------------------------------	-------------------------------	------------------------------

1. Grupa koja podnosi zahtjev i legitimni interes

[Navedite naziv, adresu, telefon i adresu e-pošte grupe koja predlaže izmjenu. Dostavite i izjavu u kojoj se objašnjava pravovaljani interes grupe koja podnosi zahtjev.]

2. Rubrika specifikacije proizvoda na koju se primjenjuje izmjena

- Opis proizvoda
- Dokaz porijekla
- Metoda proizvodnje
- Poveznica
- Označavanje
- Ostalo [treba navesti]

3. Vrsta izmjene (izmjena)

- Izmjena specifikacije proizvoda registriranog ZOO-a ili ZOGP-a koja se može smatrati manjom izmjenom.
- Izmjena specifikacije proizvoda registriranog ZOO-a ili ZOGP-a koja se može smatrati manjom izmjenom.
- Izmjena specifikacije proizvoda registriranog ZOO-a ili ZOGP-a koja se može smatrati manjom izmjenom.
- Izmjena specifikacije proizvoda registriranog GTS-a koja se može smatrati manjom izmjenom.

4. Izmjena (izmjene)

[Za svaku rubriku označenu u prethodno navedenom odjeljku navedite opis i sažetak razloga za svaku izmjenu. Za svaku izmjenu moraju se detaljno uporediti originalna specifikacija proizvoda i, prema potrebi, originalni jedinstveni dokument s predloženim izmijenjenim verzijama. Navedite i jasno obrazloženje zašto se izmjena može smatrati manjom izmjenom. Zahtjev za manjom izmjenom mora biti samodostatan.]

ANEKS VIII

ZAHTJEV ZA PONIŠTENJE

Zahtjev za poništenje u skladu s članom 55. stav (1) ovog Pravilnika

[Registrirani naziv:] „...”

EU br.: [samo za uporabu u EU-u]

[Označite odabrano znakom „X”:]	<input type="checkbox"/> ZOZP	<input type="checkbox"/> ZOI	<input type="checkbox"/> ZTS
---------------------------------	-------------------------------	------------------------------	------------------------------

1. Registrirani naziv čije se poništenje predlaže

...

2. Vrsta proizvoda [kao u Prilogu XI.]

...

3. Osoba ili tijelo koje podnosi zahtjev za poništenje

[Navedite naziv, adresu, telefon i adresu e-pošte fizičke ili pravne osobe ili proizvođača iz člana 55. stav (1) ovog Pravilnika koji zahtijevaju poništenje. Dostavite i izjavu u kojoj se objašnjava pravovaljani interes fizičke ili pravne osobe koja podnosi zahtjev za poništenje.]

...

4. Vrsta poništenja i razlozi

U skladu s članom 55. stav (1) ovog Pravilnika

tačka a)

[Navedite detaljne razloge i, gdje je to primjereno, dokaze za poništenje registracije naziva u skladu s članom 55. stav (1) tačka a) ovog Pravilnika.]

tačka b)

[Navedite detaljne razloge i, gdje je to primjereno, dokaze za poništenje registracije naziva u skladu s članom 55. stav (1) tačka b) ovog Pravilnika.]

U skladu s članom 55. stav (2) ovog Pravilnika

[Navedite detaljne razloge i, gdje je to primjereno, dokaze za poništenje registracije naziva u skladu s članom 55. stav (2) ovog Pravilnika.]

ANEKS IX

SPECIFIKACIJA PROIZVODA ZA GARANTOVANO TRADICIONALNI SPECIJALITET

[Upišite naziv kao u tački 1. u nastavku:] „”

Broj za evidenciju Agencije za sigurnost hrane BiH

1. Naziv (nazivi) koje je potrebno upisati u registar

...

2. Vrsta proizvoda [kao u Aneksu I. ovog Pravilnika]

...

3. Razlozi za registraciju

3.1. *Proizvod:*

je rezultat načina proizvodnje, prerade ili sastava odgovarajućeg tradicionalnog postupka za taj proizvod ili prehrambeni proizvod

se proizvodi od sirovina ili sastojaka koji se tradicionalno koriste

[Navedite objašnjenje]

3.2. *Naziv:*

tradicionalno se koristi za označivanje specifičnog proizvoda

opisuje tradicionalna svojstva ili specifična svojstva proizvoda

[Navedite objašnjenje]

4. Opis

4.1. *Opis proizvoda na koji se odnosi naziv iz tačke 1., uključujući njegova glavna fizikalna, hemijska, mikrobiološka i senzorska svojstva koja dokazuju njegov specifičan karakter**

...

4.2. *Opis metode proizvodnje proizvoda na koji se odnosi naziv iz tačke 1. uključujući, gdje je to prikladno, prirodu i svojstva upotrijebljenih sirovina ili sastojaka i metodu pripreme proizvoda**

...

4.3. *Opis ključnih elemenata koji određuju tradicionalna svojstva proizvoda**

U opisu proizvoda kao garantovano tradicionalnog specijaliteta iz člana 26. stav (1) tačke b) ovog Pravilnika navode se samo svojstva potrebna za identifikaciju proizvoda i njegovih specifičnih svojstava. U njemu se ne ponavljaju opće obveze, posebno ne tehničke značajke svojstvene svim proizvodima tog tipa ni pripadajući obvezni pravni zahtjevi.

Opis metode proizvodnje iz člana 26. stav (1) tačke b) ovog Pravilnika odnosi se samo na metodu proizvodnje koja se trenutačno primjenjuje. Tradicionalni se postupci navode samo ako se još uvijek primjenjuju. Opisuje se samo metoda koja je potrebna za dobivanje posebnog proizvoda, na način koji omogućuje reprodukciju proizvoda bilo gdje.

Ključni elementi koji dokazuju tradicionalni karakter proizvoda uključuju glavne elemente koji su ostali nepromijenjeni, s preciznim i dobro utemeljenim upućivanjima.

PREDNACRT

ANEKS X**ZAHTJEV ZA GARANTOVANO TRADICIONALNI SPECIJALITET**

Naziv grupe	
Pravni status grupe	
Broj članova grupe	
Adresa grupe	
Broj telefona, fax, e-mail	
Ime i prezime, adresa i broj telefona odgovorne osobe grupe koja podnosi zahtjev	
Ime i prezime, adresa opunomoćene osobe koja zastupa grupu koja podnosi zahtjev	

PRILOZI UZ ZAHTJEV (označiti priloženo – staviti križić X):

- Kopija dokaza o registraciji grupe
- Izjavu nadležnog organa grupe o usvojenoj odluci o zaštiti naziva poljoprivrednih ili prehrambenih proizvoda garantovano tradicionalnog specijaliteta
- Punomoć (dostaviti samo ako grupu zastupa ovlašteni zastupnik ili opunomoćenik, ovjerenu od javnog bilježnika)
- Specifikacija proizvoda

Mjesto i datum:

Pečat i potpis odgovorne osobe:

ANEKS XI

ZAHTJEV ZA ODOBRENJE VEĆE IZMJENE SPECIFIKACIJE PROIZVODA ZA GARANTOVANO TRADICIONALNI SPECIJALITET

[Registrirani naziv] „”

Broj za evidenciju Agencije za sigurnost hrane BiH

1. Grupa koja podnosi zahtjev i legitimni interes

Naziv grupe

Adresa

Telefon: +

Adresa e-pošte:

Dostavite izjavu u kojoj se objašnjava pravovaljani interes grupe koja predlaže izmjenu.

2. Rubrika specifikacije proizvoda na koju se primjenjuje izmjena

Naziv proizvoda

Opis proizvoda

Metoda proizvodnje

Ostalo [treba navesti]

4. Vrsta izmjene (izmjena)

Izmjena specifikacije proizvoda registriranog GTS-a koja se ne može smatrati manjom izmjenom.

5. Izmjena (izmjene)

[Za svaku rubriku označenu u prethodno navedenom odjeljku 2. navedite iscrpan opis i posebne razloge za svaku izmjenu. Za svaku se izmjenu izvorna specifikacija proizvoda mora detaljno usporediti s predloženom izmijenjenom verzijom. Zahtjev za izmjenu mora biti samodostatan. Informacije navedene u ovom odjeljku moraju biti sveobuhvatne.]

ANEKS XII

OBAVIJEST O PRIVREMENOJ IZMJENI

Obavijest o privremenoj izmjeni u skladu s članom 53. stav (5). ovog Pravilnika

[Registrirani naziv] „”

Broj za evidenciju Agencije za sigurnost hrane BiH

[Označite odabrano znakom „X”:]

ZOO

ZOGP

GTS

1. Izmjena (izmjene)

[Navedite rubriku specifikacije proizvoda na koju se primjenjuje izmjena. Navedite detaljan opis i razloge za svaku odobrenu privremenu izmjenu, uključujući opis i ocjenu posljedica te izmjene na zahtjeve i kriterije koje proizvodi moraju ispunjavati u okviru sistema kvalitete (član 4. stav (1) tč. k) i l) i član 25. st (1) i (2) ovog Pravilnika za ZOO, ZOGP odnosno GTS). Navedite i detaljan opis mjera koje opravdavaju privremene izmjene (sanitarne i fitosanitarne mjere, formalno priznanje prirodnih katastrofa ili nepovoljnih vremenskih uslova itd.) te razloge zbog kojih su te mjere poduzete. Opišite i odnos između tih mjera i odobrene privremene izmjene.]